



Route de Bâle, pour les Vieux fatal

Mir sin die Alte vo der J.B. Gligge
Und sueche sofoort, meeglisch e schigge
Spootleerer, wo uns kunnt go drainiere
Derzue no aine, wo ka Musggle massiere

Us unserem scheene Gliggelokaal
Mache mir jetz e Gymnastigsaal
In d'Jebigsstunde muesch mit Durnschue koo
S Piccolo und d Schlegel kasch dehaime loo

S Drummle und Pfyffe isch bi uns nimme inn,
Fitness isch unsere neysti Fasnachtssinn
Mir Alte siige nämlig, dasch schiints woor
An der Fasnacht der greeschi Steerfagdoor

Drumm mien mir jetze speertle, nit us Vergniege
Nai, es isch verdeggel zem Veegel griege
S isch alles nur wäge dääre Furzidee
Vo unserem drimmlige Fasnachtskomytee

Das wott uns Alte jetze gruusig schelle
Si wänn uns neyerdings viermool zelle
Wel si dooderzue alliwyyl no iiri Finger mien nää
Sott me doch dääne gscheiter e Zellraame gää

Wel die maine, mer sotte vier Komytees begriesse
Mien mir zäpfe, kenne der Cortège nimme gnesse
Mir kenne nimme wie allewyyls gmielig uff d Rutte
Nai, mir mien jetzt hailoos diigere und uns arg sputte

Kasch nimme in Rue go en Ainerli yynedätsche
Kasch nimm mit andere Gligge e weeneli rätsche
Als ghetzte Aff muesch jetz durch d Fasnacht flitze
Bruchsch Dobbing, holsch bim Komytee dini Ebo-Spritze

E sottigi Neyordnig kenne mir Alte nit akzeptiere
Trotz Fitness, wänn mir uff soonere Route nit marschiere
Stainebürg und Wettstaibrugg deruff, s wäri jo veruggt
Ooni uns, wel jo by jedem berails s aige Bobooli druggt

Der Gnoche Fredy, mit siiner Fuessarthroose
gaitscht: "Wenn kann i denn äändlig ain go bloose?"
S Rätschbäase Reesli mit sym Ryymatys Bai
Brielt: "I ka nimme so spuele, i gang jetzt hai!"

Der Gicht Kaarli duets lut uuse saage:
"Ii bi duure, ii hogg jetz uff Lampewaage."
S Raucher Vreni vo der zwaite Stimm
Hächlet: "I grieg kai Luft me, das isch schlimm."

S Vordraabs Anni steggled iibere Trottoir Rand
Alli Zeedel gheiere uss der zittrige Hand,
Sii liit am Bode, duet nuudlefeertig flenne:
"Worum verdeggel mien mir au e soo renne?"

Die im Komytee sinn wiirgglig nimme ganz bache
Wenn de ggesch, was die mit uns Alte wänn mache
Derbyy sottes doch grad so Mumie beschtens bigryffe
As mir d Bumpi bruuche firs Ruesse und Pfyffe.

All die Alte Gardene, wo sich nyt mee leen lo saage
Liige halt em Komytee schwäär uff em Maage
Das Komytee, wo d Frau Fasnacht nimme eschtiert
Sondern karrieregail nur no mänaged und zelebriert.

Dääne schwarze Huetschwängger am Cortègerand
Fäält doch aidyttig der ächti Fasnachtsverstand
Wel si umsverwoorge nit eschtimiere wänn
As sii die hittigi Fasnacht, uns Alte z verdange hänn

Miir sin Joorzääntelang aagfrässe mitmarschiert
Miir hänn Gsichter kaschiert und d Ladättere laggiert
Miir hänn die Jungi Garde gfiert und instruiert
Miir hänn d Märsch giebt und der Bummel organisiert.

Miir hänn mit unsere Sujets d Fasnacht lääbig ghalte
S Komytee het derfir deerfe, d Blagettegälder bhalte
Ooni uns wurd au s Drummeli nimme existiere
Miir hänn d Ydee und dr Grampf gha, und syy kassiere.

Iir Komytee Dame und Heere hänn eich aber gschnitte
Mir mache Fasnacht no unsere aigene, bewäärte Sitte
So wies uns basst, mir leen is vo eich nit lo floone
Und pfyffen au, uff eiri schmiirzelige Subvântioone.